

明
經
圖
雜
著

明醫雜著目錄

卷之一

醫論

發熱論

補陰丸論

勞瘵

枳朮丸論

化痰丸論

備用要方暑症

卷之二

泄瀉

痢疾

瘧疾

咳嗽

痰飲

擬治嶺南諸病

卷之三

續醫論

喘脹

氣虛血虛

飲食過傷

頭痛

眼赤腫痛

耳鳴如蟬

鼻塞

牙床腫痛

小便不禁

男子陰痿

夢遺精滑

婦人女子經脉不行

婦人半產

東垣丹溪治病方論

或問東垣丹溪治病之法

暑病

附滑伯仁先生診家樞要

卷之四

風症

擬治諸方

卷之五

臍風

變蒸

潮熱

大小便白

小兒病多屬肝脾二經

急驚

急驚變慢驚

驚搐

小兒用藥不宜峻厲

驚後目動咬牙

小兒好睡

出痘發搐

益黃散治病

傷風流涕

驚搐等症候用藥餌

風癰及脚指常腫

小兒無補腎法

擬定諸方

序次丹溪小兒痘瘡治法

卷之六

附方 畢

R24-53
1
明醫雜著卷之三

續醫論

吳郡後學薛已註

喘與脹二症相因必皆小便不利喘則必生脹
脹則必生喘但要識得標本先後先喘而後脹
者主於肺先脹而後喘者主於脾何則肺金司
降外主皮毛經曰肺朝百脉通調水道下輸膀
胱又曰膀胱者州都之官津液藏焉氣化則能
出矣是小便之行由於肺氣之降下而輸化也
若肺受邪而上喘則失降下之令故小便漸短

以致水溢皮膚而生脹滿焉此則喘爲本而脹爲標治當清金降火爲主而行水次之脾土惡濕外主肌肉土能尅水若脾土受傷不能制水則水濕妄行浸漬肌肉水旣上溢則邪反侵肺氣不得降而生喘矣此則脹爲本而喘爲標治當實脾行水爲主而清金次之苟肺症而用燥脾之藥則金得燥而喘愈加脾病而用清金之藥則脾得寒而脹愈甚矣近世治二症但知實脾行水而不知分別脾肺二症予故爲發明之愚按前症若肺中伏熱不能生水而喘且渴

者用黃芩清肺飲以治肺用五淋散以清小便若脾肺虛弱不能通調水道者宜用補中益氣湯以培元氣用六味地黃丸以補腎水若膏粱厚味脾肺積熱而喘者宜清胃散以治胃用滋腎丸以利小便若心火尅肺金而不能生腎水者用人參平肺散以治肺用滋陰丸以滋小便若腎經陰虧虛火爍肺金而小便不生者用六味地黃丸以補腎水用補中益氣湯以培脾土若脾氣虛弱不能相制而喘者用補中益氣湯以培元氣用六味地

黃丸以生腎水若肝木尅脾土不能相制而喘者用六君柴胡升麻以培元氣六味地黃丸以補腎水若脾胃虛寒不能相制而脹者用八味丸以補脾肺生腎水若脾腎虛寒不能通調水道而脹者宜用金匱加減腎氣丸補脾肺生腎水若酒色過度虧損足三陰而致喘脹痰湧二便不調或大小便道相牽作痛者亦宜用此丸多有生者○一富商飲食起居失宜大便乾結常服潤腸等丸後胸腹不利飲食不甘口乾體倦發熱吐痰服二陳

黃連之類前症益甚小便滴瀝大便泄瀉腹
脹少食服五苓薤麥之類小便不通體腫喘
嗽用金匱腎氣丸補中益氣湯而愈○一儒
者失於調養飲食難化胸膈不利或用行氣
消導藥咳嗽喘促用行氣化痰肚腹漸脹用
行氣分利睡卧不能兩足浮腫小便不利大
便不實肺腎脉浮大按之微細兩寸皆短朝
用補中益氣湯加薑附夕用金匱腎氣丸加
骨脂肉果各數劑諸症漸愈再佐以八味丸
兩月乃能步履却服補中八味半載而康

氣虛補氣用四君子湯血虛補血用四物湯虛甚者俱加熟附子蓋四君四物皆和平寬緩之劑湏得附子健悍之劑行之方能成功附子熱藥本不可輕用但當病雖在暑熱時月亦可用也予嘗治一僕人五月間病熱口渴唇乾譫語診其脉細而遲用四君子湯加黃芪當歸芍藥熟附子進一服熱愈甚狂言狂走或曰附子差矣診其脉如舊仍增附子進一大服遂汗出而熱退脉還四至矣又嘗治一婦人亦夏間病熱初用平調氣血無清熱和解之劑服二三服不

應熱愈甚舌上焦黑膈間有火嗽水不嚥診其
脉兩手皆虛微而右手微甚六七日內謔語撮
空循衣摸床惡症俱見後用四物湯加黃芪人
參白朮陳皮麥門知母熟附子服之一二時汗
出而熱退次日復熱再服仍退又次日復發知
其虛極也遂連進十服皆加附子而安

愚按前論正所謂捨時從症捨症從脉真有
定見者也○一男子發熱煩渴頭痛誤行發
汗喘急腹痛自汗謔語用十全大補加附子
治之熟睡喚而不醒及覺諸症頓退再劑而

痊○黃武選飲食勞倦發熱惡寒誤用解表
神思昏憤胸發赤斑脉洪數而無力余曰此
內傷元氣非外邪也急用溫補之劑彼不從
後果歿

飲食過傷變爲異常急暴之症人多不識嘗有
一壯年人忽得暴病如中風狀口不能言語目
不識人四肢不舉急投蘇合香丸不效予偶過
聞之因詢其由曰適方陪客飲食後忽得此症
遂教以煎生薑淡鹽湯多飲探吐之吐出數碗
而醒後服白朮陳皮半夏麥芽調理而愈大抵

此等症多因飲食醉飽之後或感風寒或着氣
惱而致飲食填塞胃氣不行內傷特重若誤作
中風中氣症而用驅風解表行氣散氣之藥則
胃氣重傷死在旦夕內經雖有暴病暴死之症
但恐多有因於食者前輩不曾明言故人不識
耳今後遇有此等急症須要審問明白若方飲
食醉飽或累傷飲食重複受傷但覺胸膈有食
滯只作傷食治之

愚 嘗治趙吏部患吐物出皆酸味其脉氣
口大於人迎者二三倍僚友速余投劑余曰

此實邪在上候其吐盡酸味不藥自愈翌早
吐止而安○一婦人飲食後因怒忽患血崩
四肢逆冷抽搐口禁如發瘧然吐痰如湧灌
以二陳柴胡山梔枳殼吐出酸味神思稍醒
藥止次日進薄粥少許但乳脇脹痛寒熱欲
嘔四肢倦怠余以爲悉屬肝火熾盛致脾氣
不能運化先用六君柴胡山梔釣藤鈎諸症
頓退惟四肢不遂血崩如初或又以爲肝火
未息欲投清肝涼血之劑余以爲肝脾氣血
俱弱先用補中益氣湯培其脾土而血氣歸